

Seri: CGA ta splika

Artíkulo 2: CGA, e outoridat

Trayekto di lei, ta un trayekto largu ku ta keda inisiá dor di Gobièrnu òf Parlamento. Promé ku un lei, manera e Ordenansa Nashonal di Wegu di Plaka (LOK) por drenta na vigor, e proseso legislativo mester pasa e sektor, Raad van Advies, SER, Raad van Ministers mester aprobá e propishon di lei i finalmente Parlamento ta deliberá tokante, akordá i pasa un lei. E proseso aki ta forma parti di e struktura demókratiko den nos pais kaminda tur e aktornan importante den e kadena legislativo mester partisipá aktivo, independiente i krítiko ku ta resultá den un lei ku nos tur mester tene nos na dje.

E lei LOK ku a drenta na vigor na desèmber 2024, tin e ophetivonan di salbuardiá un oferta di wega di plaka saludabel na i for di Kòrsou, prevení i kombatí aktividatnan kriminal, inkluso salbuardiá e integridat di e organisadó di wega di plaka i protehá hungadónan den wega di plaka. E ophetivo di e lei ta tambe garantisá un wega hustu i garantisá trato habrí i hustu di partisipantenan di wega di plaka. Mas aleu e ophetivo ta pa prevení i kombatí adikshon na wega di plaka i protehá personanan vulnerabel, inkluyendo menornan di edat i salbuardiá e reputashon internashonal di Kòrsou, partikularmente komo industria di wega di hazar.

LOK a instituí tambe un órgano públiko independiente (Zelfstandig Bestuursorgaan (ZBO)), ku ta karga e nòmber Curaçao Gaming Authority (CGA) i tin komo meta di ta e outoridat ku ta ehekutá e lei. Areglo di estado (Staatsregeling) di Kòrsou ta regla den artíkulo 111, insiso 1 ku un órgano públiko independiente ta ehekutá tareanan públiko spesífiko. E organisashon, komposishon i outoridat di e órgano públiko independiente ta wòrdu regulá pa un Ordenansa Nashonal. Hasiendo esaki a traspasá e fundashon ku ántes tabata supervisá e merkado di wega di plaka den CGA, manteniendo su statutonan.

Pues, e Ordenansa Nashonal pa Wegu di Hazar (LOK) ku ta rigi wega di plaka ku ta keda brindá na i for di Kòrsou ta determiná, sentralisá i regulá tambe henter e supervishon riba e sektor di wega di hazar serka Curaçao Gaming Authority (CGA). Den e lei ta indiká kon CGA ta keda manehá, tambe kontrolá i pasobra e ta un órgano públiko independiente, bou di ken su responsabilidadat polítiko e entidat ta kai. Pues, CGA su responsabilidadat ta pa ehekutá e lei, apliká su reglanan konsistentemente i supervisá kumplimentu. Ku otro palabra, CGA komo órgano públiko independiente, ta evaluá pa e sektor di wega di plaka aplikashonnan pa lisensia, ta monitoriá si lisensiadonan ta kumpli ku lei, ta kontrolá integridat di operadornan i ta enforsá regla ora tin malpráktika.



Mirando e variedat di weganan di hazar ku tin i ta regulá na Kòrsou, a pone den lei publiká 24 di desèmber 2024, mas énfasis riba wega di plaka remoto, esta online gaming ku ántes tabata kai bou e lei Landsverordening Buitengaats Hazardspelen (LBH). Ku entrada di LOK, CGA a bira e reguladó independiente pa wega di plaka online, ku outoridat pa otorgá, kambia, suspendé i kita lisensia, supervisá kumplimentu i apliká lei. LOK tambe a introdusí un obligashon di notifikashon pa weganan di plaka non-profit, manera rifa, bingo i bon ku ne na CGA. Tambe CGA ta supervisá kasinonan lokal bou di mandato/otoridat di Minister di Finansas i por último CGA tin supervishon di loteria lokal ku ta kai bou di outoridat di Minister di Finansas, respektivamente, tambe komo su tarea. Pues, kada wega di plaka ta derivá for di su propio lei ku ta regulá kiko por, kiko no por i kon i kon leu CGA ta responsabilisá su aktonan pa loke ta trata e wega konserní.